

COLUMNA

Ils malomers

PAULIN NUOTCLÀ

Noss baps d'eiran impiegats da la Viafier retica, dimena pro la «retica» co chi's dschaiva simplamaing. Meis bap d'eira «Bahnmeister Bezirk Nr. 6», responsabel per la sgürezza ed il mantegniment dal traiget difficil da l'Alvra. Il bap da meis meglter pruoder da scoula d'eira capolingia superiur, dimena «Vorarbeiter». Meis bap gniva nomnà da seis chars collegas da lavur «Paul der sechste» o «Paulo sesto», ün'allusiun al Papa Paul VI. chi faiva furore superconservativo a Roma quella vouta.

Il bap da meis compel nu vaiva ingün surnom, per no d'eira'l simplamaing «sar Sep». Seis figl d'eira nat incirca al listess di sco eu, aint pel november in seguit a las naiveras in favrer dal 1951, causa cha'ls seniors nu vaivan das-chü per ün pèr dis



far lur servezzan pervi da la blera naiv.

Meis ami d'eira ferm sco ün uors ed eir bundant ün cheu plü grond co tschels conscolars. E pro dispittas daiva quai üna ramanada ed ils inimis d'eiran per uschedir neutralisats. Per mai, cun mia leua locca, d'eira quai adüna ün grond avantag.

Ün di cur cha sar Sep e Paul VI. vaivan da cal-

cular las pajas per lur lavuraints in quel pitschen büro fümantà e ch'eu d'eira sco relativ bun quintist ingaschà per controllar amo üna jada las sommas per chi saja güst, n'haja dudi ün discuors tanter ils baps dals duos malomers. Sar Sep: «Teis furber stübgia oura ils maloms e meis tuttel fa.» – Paul VI.: «Na, na, quai lura nu craja, id es precis suotsura. Meis sarà ün bun scolar e's ruina ils ögls cun leger cudeschs, ma teis es plü furber!» – Sün quai as volva sar Sep vers mai, musc musc in meis chantun e disch: «I sarà sco chi'd es, che's voula far.» Ed in seis dialect da Scuol Sot: «Sco a voo dus füssa da strar oora la böglia dad ün e stranglar a tschel cun tot!» – Insomma, eir ün'idea cristianavla.

Paulin Nuotclà è artist da sgrafit, chantatur ed illustratur – e viva a Susch.

*«Jau na consideresch mamez betg sco otgavel cusseglier federal, plitgusch sco funcziunari suprem. Mia pussanza è limitada. Jau hai però in pau influenza. Jau poss intermediar u diriger, jau coordinesch e fatsch propostas.»*

*Uschia sa preschenta il chancelier federal Walter Thurnherr sin la pagina d'internet da la Confederaziun – per rumantsch.*

AURA

Venderdi surtratg, suenter er in zic sulegl

**Situaziun generala:** La zona da pressiuun auta sur la Scandinavia s'indeblescha e maina aria da mar umida e frestga vers las Alps.

**Oz:** Nord da las Alps e Grischun Central: La damaun anc sulegliv, vers saira surtratg ed emprims uradis. Temperatura fin 11 grads. Sid da las Alps ed Engiadina: Per gronda part sulegliv.

**Prognosa:** Nord: Venderdi variabel ed intngins uradis, sur 1000 meters naiv. Sonda e dumengia per part sulegliv, ma er intngins uradis. Sid: Venderdi surtratg e paucas scleridas, sonda e dumengia detg sulegliv.




FOTO-FINISH



FOTO GEOGR.CH

Il schic mosaic

Sa chapescha, la soluziun dal «schic mosaic» en la gasetta dadier è Mulegns. Il «schic mosaic» dad oz mussa il vitg da...? – Ils dus tips per oz: **1. tip:** La fracziun

posseda in agen implant electric pitschen. **2. tip:** En la chasa da cultura pon ins contemplar in grond cristal – il segund avess da turnar bainbaud a chasa.

Di per di mussa la redacziun da la FMR ina survista cartografica dad ina vischnanca grischuna, però ina carta mo cun ils edifizis e senza vias, nums ed auals. (fmr/dd)

IL TIP

«Rumantsch è ...»

HANS HUONDER/FMR

Da preschent è da vesair en la chasa da cultura ed art Cularta a Laax in'exposiziun tut speziala. Ella porta il num «Rumantsch è ...» e sa fatschenta dal rumantsch e dals Rumantschs. Suenter che quella revista davart noss quart linguatg naziunal è stada da vesair en pliras citads da la Svizra, e lura er gia a Scuol, vegn ella mussada uss l'emprima giada en Surselva. A Laax – ina vischnanca cun buna schientscha per il rumantsch – è ella il mument en buns mauns.

L'exposiziun è vegnida stgaffida durant il temp da la pandemia dal coronavirus. L'onn 2020 ha Christian Rathgeb – alura anc cusseglier guvernativ e lezonn er president da la regenza




grischuna – inizià quest'exposiziun. Sut l'egida da la Lia Rumantscha è ella vegnida stgaffida dad Anna.R.Stoffel. L'exposiziun ch'è vegnida realisada per preschentar il rumantsch en l'entira Svizra, dat in sguard en l'olma dal rumantsch. Ella è concepida cun elements auditivs, films, piramidas cun infurmaziuns e cedels da notizia. Sin quels s'expriman bleras persunas davart lur

relaziun cun lur linguatg matern rumantsch. Gist quels cedels da notizia dattan – tenor mes manegiar – ina nota tut speziala a l'exposiziun.

Ina part integrala dad ella è ina carta geografica da la Svizra. Er quella è speziala. En in engaschament da pli che 500 uras ha Donat Caduff dà nums rumantschs a tuttas vischnancas svizras e sin questa carta èn quels da vesair. Sin questa carta pon ins guardar nua che Ducabuxa, Vinnavil-Praplaniv ni er Vedervitg e Maileras è. Temp d'avertura da la Cularta a Laax mira [www.cularta.ch](http://www.cularta.ch).

Di per di dat ina redactura u in redactur da la FMR in tip a lecturas e lecturs – in cussegli u ina recumandaziun, senza impegn e senza garanzia che quel «tip» plaschia alura a tuttas e tuts.



CARICATURA LINUS FLEPP